



Krizni štab Ministarstva zdravstva, rada i socijalne politike Unsko-sanskog kantona

Krizni štab Ministarstva zdravstva, rada i socijalne politike Unsko-sanskog kantona, u cilju daljnjeg praćenje situacije i poduzimanje mjera radi sprječavanja i ranog otkrivanja eventualnog slučaja bolesti izazvane novim koronavirusom (COVID -19), koja je Zaključkom Vlade Federacije BiH, V. broj 164/2020 od 31.01.2020. godine proglašena zaraznom bolešću čije je sprječavanje i suzbijanje od interesa za Federaciju BiH, postupajući po Naredbi Kriznog stožera Federalnog ministarstva zdravstva, broj: 01-33-1426/20 od 11. marta 2020.godine, u skladu sa odredbom člana 6. stav (5) Pravilnika o organizaciji i načinu rada Kriznog štaba Federalnog ministarstva ("Službene novine Federacije BiH", broj 10/12), donio je sljedeću

N A R E D B U

1. U skladu sa preporukom specijaliste epidemiologa Zavoda za javno zdravstvo USK, mjere i procedure nadzora koje se primjenjuju na sedam država taksativno pobrojanih u tački 1. Naredbe Kriznog stožera Federalnog ministarstva zdravstva, od 10. marta 2020.godine, primjenjuje se i na putnike iz Republike Slovenije, koji dolaze na područje Unsko-sanskog kantona. Rok: Kontinuirano.
2. U skladu sa procjenom epidemiološke situacije, obustavlja se nastava u osnovnim, srednjim i visokoškolskim ustanovama na području Unsko-sanskog kantona, u periodu od 13.03.2020.godine do 29.03.2020.godine.
U istom periodu obustavlja se održavanje sportskih treninga za djecu i mlade na području Unsko-sanskog kantona.
3. U skladu sa procjenom epidemiološke situacije, obustavlja se održavanje kulturnih, sportskih, naučnih, stručnih, vjerskih i drugih događanja na području Unsko-sanskog kantona, u trajanju od 15 dana. Rok:odmah.
4. Nalaže se javnim zdravstvenim ustanovama, kao i privatnim zdravstvenim ustanovama i privatnim praksama na području Unsko-sanskog kantona, da obustave redovne specijalističko - konsultativne preglede, a neophodne specijalističko-konsultativne preglede obavljaju po procjeni specijaliste. Rok:odmah
5. Nalaže se higijensko-epidemiološkim službama Domova zdravlja, da pojačaju epidemiološki nadzor u dječjim vrtićima i ustanovama za socijalnu zaštitu za djecu, mlade i stare osobe, kao i kazneno popravnim ustanovama, te da se navedene ustanove pridržavaju preporučenih higijenskih mjera. Rok: odmah
6. Svim osobama na području Unsko-sanskog kantona, kojima je izrečena mjera radi sprječavanja širenja novog koronavirusa (COVID-19), u skladu sa Zakonom o zaštiti

stanovništva od zaraznih bolesti ("Službene novine Federacije BiH", broj 29/05), od strane Ministarstva zdravstva USK, federalne granične sanitarne inspekcije ili kantonalne sanitarne inspekcije, nalaže se striktno pridržavanje naloženih mjera u predviđenom trajanju, pod prijetnjom prekršajne i krivične odgovornosti.

Službenim osobama koje su izdale rješenja o provođenju navedenih mjera, kao i higijensko-epidemiološkim službama Domova zdravlja, nalaže se kontinuirana kontrola naređenih mjera, odnosno kontrola izdatih rješenja o naloženim mjerama. Rok: odmah.

7. Preporučuje se zdravstvenim radnicima sa područja Unsko-sanskog kantona da ne putuju u inostranstvo, posebno na organizovana stručne i naučne skupove, kao i turistička putovanja u inostranstvo. Rok: kontinuirano do daljnjeg.

8. Pozivamo građane Bosne i Hercegovine, koji žive ili rade u zemljama pogođenim novim korona virusom (COVID-19), da ne dolaze, bez veće potrebe, na područje Unsko-sanskog kantona, zbog povećanog rizika od unošenja novog koronavirusa, a što bi dodatno moglo rezultirati pogoršanju epidemiološke situacije na području Unsko-sanskog kantona. Rok: kontinuirano do daljnjeg.

9. Traži se od Federalnog ministarstva zdravstva i Kriznog stožera Federalnog ministarstva zdravstva da osiguraju potrebna odobrenja od strane Ministarstva odbrane BiH, kako bi se u kasarni „Adil Bešić“ u Bihaću (paviljoni), mogla organizirati karantena za područje Unsko-sanskog kantona, koja je prijeko potrebna zbog blizine graničnih prelaza i velikog broja građana koji rade u zemljama pogođenim koronavirusom. Rok: odmah.

10. Traži se od Federalnog ministarstva zdravstva i Kriznog stožera Federalnog ministarstva zdravstva da osiguraju nabavku najmanje jednog mobilnog rentgen aparata (Kantonalna bolnica ne raspolaže niti jednim mobilnim RTG) i 10 respiratora. Rok: odmah.

11. Nalaže se Kantonalnoj upravi civilne zaštite da osiguraju nabavku dezinficijensa-ZOONO preparata, za dezinfekciju svih javnih zdravstvenih, obrazovnih i drugih ustanova i institucija, u vrijednosti od cca 50.000 KM. Osim navedenog, nalaže se Kantonalnoj upravi civilne zaštite da osiguraju nabavku antibakterijskih podloga za održavanje dezinfekcione barijere, za vanjske ulaze u zdravstvene ustanove, kao i ulaze na odjele Kantonalne i Opće bolnice. Rok: odmah.

12. Nalaže se svim Domovima zdravlja da pojačaju rad Hitne medicinske pomoći (HMP), te u tom smislu da:

a) Putem sredstava informisanja obavijeste stanovništvo svoje općine/grada, o broju telefona koji mogu koristiti osobe koje su pod zdravstvenim nadzorom ili osobe koje su bile u kontaktu sa osobom stavljenom pod zdravstveni nadzor, u slučaju pojave simptoma vezanih za infekciju koronavirusom. Rok: odmah.

b) Putem sredstava informisanja obavijeste stanovništvo svoje općine/grada, o broju telefona koji mogu koristiti osobe radi konsultacija u vezi svog zdravstvenog stanja, a zbog trenutnog odlaganja obavljanja konsultativno-specijalističkih pregleda. Rok: odmah.

13. Preporučuje se svim građanima Unsko-sanskog kantona da u cilju zaštite ličnog zdravlja i zdravlja svoje porodice, kao i zaštite javnog zdravlja stanovništva Unsko-sanskog kantona, striktno pridržavaju svih preporuka Kriznog stožera Federalnog ministarstva zdravstva i Kriznog štaba Ministarstva zdravstva, rada i socijalne politike USK, kao i Federalnog i kantonalnog Zavoda za javno zdravstvo.

14. Ova naredba stupa na snagu danom donošenja.

Broj: 09-33- Sl. /20
Bihać, 12.03.2020.godine

Predsjednica Kriznog štaba MZRSP USK
Ministrica
dr.sci.prim.Nermina Čemalović